

REGLUGERÐ

um tilkynningar og skráningu vörumerkja o. fl.

1. gr.

Tilkynning vörumerkis til skráningar skal send vörumerkjaskráritara, Reykjavík. Tilkynningar skulu ritaðar á íslenzku á þar til ætluð eyðublöð, sem vörumerkjaskráritari lætur í té.

Í tilkynningu skal vera mynd af merkinu, nafn eða firma tilkynnanda, svo og upplýsingar um atvinnurekstur hans, heimili og póstaðskrift. Sé tilkynnandi ekki heimilisfastur hér á landi, skal tilkynningin enn fremur hafa að geyma upplýsingar um nafn, heimili og póstaðskrift umboðsmanns hans.

Tilkynningunni skal fylgja lögboðin greiðsla. Sé merkið ekki aðeins orð, ritað venjulegu letri, skal enn fremur fylgja nákvæm mynd af merkinu, á sterkum pappír, í 15 eintökum, ekki stærri en 10 sentimetrar á hæð og 12 sentimetrar á breidd, ásamt móti til að prenta hana eftir, jafnstóru myndinni.

2. gr.

Tilkynningu frá atvinnurekanda, sem eigi er heimilisfastur hér á landi, skal fylgja yfirlýsing um, að tilkynnandi feli umboðsmanni, sem heimilisfastur er hér á landi, að afhenda tilkynninguna fyrir hans hönd og að taka á móti málssókn og öðrum tilkynningum, er varða merkið, svo bindandi sé fyrir tilkynnanda. Umboðsmaðurinn skal taka að sér umboðið með undirritun yfirlýsingar þar um á umboðinu.

Sé tilkynning frá atvinnurekanda, sem heimilisfastur er hér á landi, ekki undirrituð af tilkynnanda sjálfum, skal tilkynningunni fylgja umboð fyrir þann, er tilkynninguna undirritar til að afhenda tilkynninguna.

Sé umboðsmanni heimilt að afturkalla tilkynninguna, skal umboðið bera það með sér.

3. gr.

Í tilkynningunni skal tilgreina þá vöruflokka og flokka þess verks eða þjónustu, er merkið óskast skráð í samkvæmt flokkaskrá þeirri, sem prentuð er sem fylgiskjal með reglugerð þessari. Ef tilkynningin á ekki að ná yfir einn eða fleiri heila flokka, skal tilgreina þær ákveðnu vörutegundir, verk eða þjónustu innan eins eða fleiri flokka, sem merkið óskast skráð fyrir.

4. gr.

Nú ber tilkynnanda, sem ekki rekur fyrirtæki hér á landi, að sanna samkvæmt 28. gr. laga nr. 47/1968 um vörumerki, að hann hafi fengið skráð í heimalandi sínu vörumerki samsvarandi því, er hann hefur tilkynnt til skráningar og að merkið hafi verið skráð þar fyrir þær vörutegundir, sem tilgreindar eru í tilkynningunni, þá skal hann láta í té útskrift úr vörumerkjaskrá heimalandsins. Útskriftina skal annað hvort fylgja tilkynningunni eða sendast vörumerkjaskráritara innan frests, er hann ákveður.

5. gr.

Ef tilkynnandi vill krefjast forgangsréttar samkvæmt ákvæðum 18. og 30. gr. laga nr. 47/1968 um vörumerki, skal þess annað hvort krafizt í tilkynningunni og þeirri kröfu fylgja upplýsingar um, frá hvaða tíma og á hvaða grundvelli forgangsréttar er krafizt, eða krafizt skriflega innan eins mánaðar frá afhendingu tilkynningarinnar og þeirri kröfu fylgja nefndar upplýsingar.

Vörumerkjaskráritari getur krafizt þess, að tilkynnandi afhendi, innan frests er vörumerkjaskráritari ákveður, fullnægjandi sönnun fyrir réttmæti upplýsinga, sem honum hafa verið gefnar.

6. gr.

Eftir móttöku tilkynningar hjá vörumerkjaskráritara er ritað á hana, hvaða dag og stund hún barst og tilkynnanda látin í té kvittun fyrir móttöku hennar.

7. gr.

Innan tveggja mánaða frá birtingardegi auglýsingar samkvæmt 20. gr. laga nr. 47/1968 um vörumerki, er sérhverjum heimilt að bera fram við vörumerkjaskráritara andmæli gegn skráningu merkis. Andmælin skulu vera skrifleg og rökstudd. Tilkynnanda skal gefið tækifæri til að tjá sig um framkomin andmæli.

Að fresti loknum tekur vörumerkjaskráritari tilkynninguna til athugunar að nýju.

Sé tilkynning samþykkt skal vörumerkjaskráritari láta tilkynnanda í té vitneskju um það og krefjast greiðslu lögboðinna flokkunargjalda. Þegar gjöldin hafa verið greidd, ber að skrá merkið í vörumerkjaskrá og auglýsa skráninguna í Lögbirtingablaði. Jafnframt er tilkynnanda sent myndrit úr vörumerkjaskrá.

Ef tilkynningu er synjað, skal skýra tilkynnanda frá því. Þegar áfrýjunarfrestir samkvæmt 44. gr. laga nr. 47/1968 um vörumerki eru liðnir, án þess að ákvörðun vörumerkjaskráritara hafi verið borin undir ráðherra eða leitað hafi verið úrskurðar dómstóla, skal auglýsa ákvörðun vörumerkjaskráritara í Lögbirtingablaði.

8. gr.

Í vörumerkjaskrá skal færa tilkynningardag og -stund, birtingardag svo og skrásetningardag og -númer. Enn fremur skal færa í vörumerkjaskrá nafn tilkynnanda eða firma, atvinnu, heimili og póstáskrift, mynd af merkinu, tilgreina þá flokka eða þá vöru, verk eða þjónustu innan eins eða fleiri flokka, sem skrásetningin nær til, svo og eftir atvikum athugasemd um forgangsrétt tilkynningarinnar. Sé tilkynnandi eigi heimilisfastur hér á landi, skal enn fremur færa nafn og heimili umboðsmanns hans í vörumerkjaskrána.

9. gr.

Samkvæmt umsókn eiganda merkis má gera minni háttar breytingar á skráðu vörumerki, enda valdi þær því eigi, að heildaráhrif merkis raskist.

Umsókn samkvæmt 1. mgr. þessarar greinar skal vera skrifleg og henni skal fylgja mynd af merkinu svo breyttu ásamt lögboðinni greiðslu.

Sé umsóknin tekin til greina, skal færa merkið í vörumerkjaskrá og birta auglýsingu þar um í Lögbirtingablaði.

10. gr.

Hver sá, sem við eigendaskipti hefur öðlast rétt á skráðu vörumerki, skal skriflega æskja þess, að eigendaskiptin séu skráð í vörumerkjaskrá. Í slíkri beiðni skal taka fram nafn eða firma, heimilisfang, atvinnurekstur og póstáskrift hins nýja eiganda, svo og skal fylgja beiðninni skjálleg sönnunargögn fyrir eigendaskiptunum ásamt lögboðnu gjaldi fyrir innritun í vörumerkjaskrá.

Auglýsing um innritun eigendaskipta skráðs vörumerkis í vörumerkjaskrá skal birt í Lögbirtingablaði.

11. gr.

Hafi eigandi skráðs vörumerkis veitt öðrum leyfi til að nota það í atvinnuskyni (licens), skal nafn eða firma, heimilisfang og póstaáskrift leyfishafa skráð í vörumerkjaskrá, ef hann eða eigandi vörumerkisins óska þess skriflega, enda fylgi beiðninni sönnunargögn um leyfisveitinguna ásamt lögboðnu gjaldi fyrir innritun í vörumerkjaskrá.

Ef réttur að skráðu vörumerki er veðsettur eða gerð er aðför í honum, skal nafn eða firmanafn og heimilisfang veð- eða aðfararhafa skráð í vörumerkjaskrá, ef þeir eða eigandi æskja þess skriflega, enda fylgi beiðninni sönnunargögn fyrir rétti veð- eða aðfararhafa, svo og lögboðið gjald fyrir innritun í vörumerkjaskrá.

Auglýsing um innritun í vörumerkjaskrá samkvæmt 1. og 2. mgr. skal birt í Lögbirtingablaði.

12. gr.

Ef eigandi vörumerkis, sem eigi er heimilisfastur hér á landi, tilnefnir sér nýjan umboðsmann, skal eigandi eða hinn nýi umboðsmaður senda vörumerkjaskráritara skriflega beiðni um, að nafn og heimilisfang hins nýja umboðsmanns verði fært inn í vörumerkjaskrá. Beiðni þessari skal fylgja tilskilið umboð samkvæmt reglum þeim, sem settar eru í 2. gr. reglugerðar þessarar. Þá er nafn hins nýja umboðsmanns hefur verið fært inn í vörumerkjaskrá, skal það auglýst í Lögbirtingablaði.

13. gr.

Verði að öðru leyti breyting á um atriði, sem áður hefur verið innfært í vörumerkjaskrá, skal sú breyting innrituð í hana, ef eigandi vörumerkisins, eða annar til þess réttbær aðili æskir þess skriflega, enda fylgi beiðni, sönnunargögn fyrir breytingunni, svo og lögboðið gjald fyrir innritun þess í vörumerkjaskrá.

Þegar breyting sú, sem hér um ræðir, hefur verið innrituð í vörumerkjaskrá, skal það auglýst í Lögbirtingablaði.

14. gr.

Sé beiðni um innritun í vörumerkjaskrá um nokkur þau atriði, sem 9.—11. gr. og 13. gr. reglugerðarinnar tekur til, ekki undirrituð af þeim aðila, sem samkvæmt ákvæðum þessara greina er til þess hæf, skal beiðninni fylgja tilskilið umboð til handa þeim, sem undirritar.

15. gr.

Beiðni um endurnýjun skráðs vörumerkis skal berast vörumerkjaskráritara í fyrsta lagi 12 mánuðum fyrir og í síðasta lagi 6 mánuðum eftir lok skráningartímabils vörumerkisins. Skal endurnýjunarbeiðni rituð á íslenzku á þar til gerð eyðublöð, er vörumerkjskráritari lætur í té. Að öðru leyti skulu ákvæði 2. mgr. 1. gr., 2. og 3. gr. gilda um endurnýjunartilkynningar svo sem við á. Endurnýjunarbeiðni skal fylgja lögboðið gjald.

Sé endurnýjunarbeiðni ekki í samræmi við þar að lútandi reglur og fyrirmæli, skal vörumerkjaskráritari veita eiganda vörumerkis hæfilegan frest til að ráða bar bót á.

Ef endurnýjunarbeiðni er enn ábótavant að ofangreindum fresti liðnum, skal henni synjað, og það tilkynnt eiganda vörumerkisins.

Þegar frestir þeir, sem um getur í 44. gr. laga nr. 47/1968 um vörumerki, eru liðnir án þess að úrskurður vörumerkjaskráritara hafi verið borinn undir ráðherra eða leitað hafi verið úrskurðar dómstóla, skal vörumerkið afmáð úr vörumerkjaskrá og auglýsing þar um birt í Lögbirtingablaði.

Sé endurnýjunarbeiðni í engu áfátt, lætur vörumerkjaskráritari beiðanda í té vitneskju um það og krefst jafnframt lögboðinna flokkunargjalda. Þegar sú greiðsla hefur verið innt af hendi, skal endurnýjun vörumerkisins skráð í vörumerkjaskrá og auglýst í Lögbirtingablaði. Jafnframt skal eiganda vörumerkisins gert kunnugt um endurnýjunina með sendingu myndrits úr vörumerkjaskrá.

Hafi beiðni um endurnýjun ekki borizt þá er 6 mánuðir eru liðnir frá lokun skráningartímabils vörumerkis, skal það afmáð úr vörumerkjaskrá og auglýsing þar um birt í Lögbirtingablaði.

16. gr.

Beiðni um að vörumerki verði afmáð úr vörumerkjaskrá, skal undirrituð af eiganda þess, ella skal tilskilið umboð fylgja beiðninni, þeim til handa, sem undirritar.

Þegar vörumerki hefur verið afmáð, skal það auglýst í Lögbirtingablaði.

17. gr.

Ef umboð, framsöl eða önnur þau skjöl, sem reglugerð þessi tekur til eru rituð á erlendu máli, getur vörumerkjaskráritari krafizt þeirra í staðfestri þýðingu löggilts skjalapýðanda.

18. gr.

Um tilkynningar vörumerkja til skráningar, sem borizt hafa vörumerkjaskráritara fyrir gildistöku laga nr. 47/1968 um vörumerki, og ekki hafa hlotið afgreiðslu, skal fara eftir eldri lögum, nema tilkynnandi hafi skriflega óskað að með tilkynningu skuli fara samkvæmt lögum nr. 47/1968 um vörumerki.

Samkvæmt 2. mgr. 47. gr. laga nr. 47/1968 um vörumerki, kemur skráning í vöruflokka samkvæmt 16. gr. sömu laga ekki til framkvæmda, um þau vörumerki, sem skráð eru samkvæmt eldri lögum, fyrr en endurnýjun skráningar þeirra fer fram. Við röðun í vöruflokka skal skráning vörumerkis ekki verða víðtækari en áður.

Reglugerð þessi er hér með sett samkvæmt lögum nr. 47 2. maí 1968 um vörumerki, til að öðlast gildi þegar í stað og birtist til eftirbreytni öllum þeim, sem hlut eiga að máli.

Iðnaðarmálaráðuneytið, 2. janúar 1969.

Jóhann Hafstein.

Brynjólfur Ingólfsson.

Fylgiskjal.

VÖRUFLOKKAR

(sbr. reglugerð um tilkynningar og skráningu vörumerkja o. fl. nr. 1 2. janúar 1969).

I. Vörur.

1. Efnavörur til iðnaðar-, visinda- eða ljósmyndunarnota og einnig til nota í landbúnaði, skógrækt og garðrækt; tilbúinn áburður og dýraáburður, slökkvitæki, efni til herzlu og kemiskar efnablöndur til lóðunar; efni til niðursuðu á matvælum; görfunarefni; bindiefni til iðnaðarnota.
2. Málaralitir, fernis, lökk; ryðvarnarefni og efni til gagndreypingar (imprægnering) á tré; litarefni; bæsunarefni; trjákvöða; blaðmálmur og málmduft til nota fyrir málara og skreytingamenn.

3. Bleikingarefni og aðrar efnablöndur til fata- og dúkaþvottar; efnablöndur til hreingerninga, fægingar og blettahreinsunar ásamt slípiefnum; sápa, ilmvörur (parfumerivörur); loftnæmar (æteriskar) olíur, efnablöndur til andlitssnyrtingar, hárvatn; efnablöndur til tannhirðingar.
4. Olíur og fituefni til iðnaðarnota (þó ekki matarolíur og feitiefni til matar eða loftnæmar olíur); smurningarefni; rykbindiefni; brennsluefni (hér með talin brennsluefni fyrir hreyfla) og efni til lýsingar; kerti, náttljós og kveikir.
5. Efnablöndur til nota sem meðul, meðul handa dýrum og efnablöndur til hreinlætis; efnablöndur til nota við sérstakt mataræði fyrir börn og sjúklinga; plástrar og efni til sáraumbúða (og annarra álíka umbúða), efni til tannfyllingar og til töku tannmóta; sóttahreinsunarefni; efnablöndur til útrýmingar illgresi, mein-dýrum og óværu.
6. Önnir og að nokkru leyti unnir, ódýrir málmar og blöndur úr þeim; akkeri, steðjar, bjöllur, völsuð og steypt byggingarefni; járnbrautarteinar og annað efni úr járn til járnbrautalagninga; keðjur (þó ekki drifkeðjur í ökutæki); leiðslukaðlar (kabler) og málmþráður, (sem ekki eru til rafmagnsnota); járnsmíðahlutir; málmþípur; peningaskápar og peningakassar; stálkúlur; skeifur; naglar og skrúfur, aðrir hlutir úr ódýrum málmum, sem ekki teljast til annarra flokka; málmur (óunninn).
7. Vélar og vinnustofuvélar; hreyflar (þó ekki í ökutæki); tengl (koblingar) og drifreimar (þó ekki í ökutæki); stór landbúnaðaráhöld; útungunarvélar.
8. Handverkfæri og -áhöld; hnífasmíðavörur, gafflar og skeiðar; högg- og lagvopn.
9. Áhöld og tækni, vísindaleg, siglingafræðileg, til landmælinga, raffræðileg (hér með talin loftskeytaáhöld og -tæki), til ljósmyndagerðar, til kvikmyndatöku og -sýninga og sjóntæki og áhöld (optísk) ásamt tækjum og áhöldum til vigtunar, mælinga, merkjasendinga, eftirlits (kontrol), björgunar og kennslu; peninga- og spilapeningasjálfsalar; talvélar, skráningartæki í peningakassa og reiknivélar; slökkvitæki.
10. Áhöld og tæki til skurðlækninga, lyflækninga, tannlækninga og dýralækninga (hér með talið gervilimir, augu og tennur).
11. Innlagningarrefni til lýsingar, hitunar, gufuframleiðslu, suðu, kælingar, þurrkunar, loftræstingar og vatnsleiðslu, ásamt efni til hreinlætislagna.
12. Ökutæki; flutningatæki til notkunar á landi, í lofti eða á sjó (og vatni).
13. Skotvopn; skotfæri og kúlur; sprengiefni; flugeldar og hlutir til flugeldasýninga.
14. Góðmálmar og málmblöndur úr þeim ásamt vörum úr góðmálmum eða vörum með húð úr góðmálmum (þó ekki hnífasmíðavörur, gafflar og skeiðar); gullsmíða- og gimsteinavörur, eðlasteinar; úr, klukkur og önnur áhöld til tíma-mælingar.
15. Hljóðfæri (þó ekki talvélar og útvarpstæki).
16. Pappír og pappírsvörur, pappi og pappavörur; prentað mál, blöð og tímarit, bækur; bókbändeefni; ljósmyndir; pappírssalavörur, bindiefni til notkunar við pappírframleiðslu; hlutir til notkunar fyrir listamenn; penslar; ritvélar og skrifstofuáhöld (þó ekki húsgögn); hlutir til leiðbeininga og kennslu (þó ekki áhöld); spil; leturstafir; myndamót.
17. Guttaperka, gúmmi, balata og gerviefni fyrir þessi efni ásamt vörum, sem framleiddar eru úr þessum efnum og ekki eru taldar í öðrum flokkum; efni til þéltunar og einangrunar; asbest; gljásteyninn (glimmer) og vörur úr þessu; slöngur, sem ekki eru úr málmum.
18. Leður og leðurlíkingar ásamt vörum úr þessum efnum, sem ekki eru taldar í öðrum flokkum; skinn og húðir; koffort og ferðatöskur; regnhlífur, sólhlífur og göngustafir; svipur, aktýgi og söðlasmíðavörur.

19. Byggingarefni, steinn og gervisteinn, sement, kalk; mörtel (blanda sands og leskjaðs kalks eða sements); gips og mól; pípur úr leir eða sementi; efni til vegalagna; asfalt; bik og bitumen; færánleg hús; steinminnismerki; reykhálfar.
20. Húsgögn, speglar, myndarammar, vörur (ekki taldar í öðrum flokkum) úr timbri, korki, reyr, spanskreyr, körfufléttum, horni, beini, filabeini, fiskbeinum, skelplötu, rafi, perlumóður, sæfrauði (merskum), trúningi ásamt gerviefnum fyrir þessi efni.
21. Minni hlutir til heimilishalds og eldhúsáhöld (þó ekki úr góðmálmum eða með húð úr góðmálmum); greiður og þvottasvampar; burstar (nema penslar); efni til burstagerðar; áhöld og efni til hreingerningar; stálull; glervörur; postulín og leirvörur (sem ekki eru taldar í öðrum flokkum).
22. Kaðlar; reipi; færi; línur; net; tjöld; sóltjöld; yfirbreiðslur; segl; pokar; bólstrunarefni (skrepphár, kapok, fiður, sægras o. s. frv.); óunnið þráðefni til framleiðslu á vefnaðarvöru.
23. Þráður og garn.
24. Ofin efni; rúmteppi og borðdúkar; vefnaðarvörur (ekki taldar í öðrum flokkum).
25. Fatnaðarvörur, þar með talið stígvél, skór og inniskór.
26. Blúndur og ísaumur; bönd og dreglavefnaðarvörur (ásamt kögulvefnaðarvörum); hnappar; tölur; þrýstilásar, krókar og lykkjur; tituprjónar og saumnálar; gerviblóm.
27. Teppi, hálm-mottur, korkmottur og annað efni til að leggja á gólf; veggklæðingarefni, sem ekki eru vefnaðarvörur.
28. Leikáhöld og leikföng, leikfimi- og sportvörur (þó ekki fatnaður); jólatrés-skraut.
29. Kjöt, fiskur, alifuglar og villibráð; kjötkraftur; niðursoðnir, þurrkaðir og sultaðir ávextir og grænmeti; ávaxtasulta og hlaup; egg, mjólk og aðrar mjólkurbúsafurðir; matarolíur og matarfeiti; niðursuðuvörur, súrsað grænmeti.
30. Kaffi, te, kókó, sykur, hrisgrjón, tapioka, sagó, kaffibætur; mjöl og matvörur úr korni; brauð, kex, kökur, sætabrauð og kökubúðarvörur, ís til matar; hunang, síróp; ger, lyftiduft; salt, sinnep; pipar, edik, vínedik, sósur; kryddvörur; ís.
31. Landbúnaðar-, skógarhöggs- og garðræktarframleiðsla ásamt korni, sem ekki er talið í öðrum flokkum; lifandi dýr; nýir ávextir og grænmeti; fræ og sáðkorn; lifandi jurtir og lifandi blóm; fóðurvörur handa dýrum, malt.
32. Öl og porteröl, ölkelduvatn og gosdrykkir og aðrir óáfengir drykkir; saft og aðrar efnablöndur til framleiðslu drykkja.
33. Vín, sterkir drykkir og líkjörar.
34. Tóbak óunnið og unnið; hlutir fyrir reykingamenn; eldspýtur.

II. Þjónusta.

35. Auglýsinga- og útbreiðslustarfsemi. Aðstoð vegna viðskiptastarfsemi.
36. Tryggingarstarfsrekstur og fjármálastarfsemi.
37. Byggingar-, útbúnaðar-, viðhalds- og viðgerðastarfsemi.
38. Samgöngustarfsemi.
39. Flutninga- og geymsluþjónusta.
40. Vinnsla og meðferð efna og hluta.
41. Uppeldis-, menntunar- og skemmtistarfsemi.
42. Önnur þjónusta, sem flokkar nr. 35—41 ekki taka til.